

- राज्य मांय पड़ रहया जोरदार तावड़ा बीचे आज श्रीगंगानगर मांय पारो 46 डिग्री सेल्सियस ने पार कीनो-मौसम विभाग आवता एक सप्ताह ताई लू बाजती रेहवण री शंका जतायी।
- राज्य री पहली महिला उपमुख्यमंत्री डॉ. कमला बेनीवाल रो पूरा सरकारी मान सागे दाग करी ज्यो।
- देश मांय लोकसभा चुनाव रा पहला चार दौर मांय 45 करोड़ ऊं बत्ता मतदाता वोट देवण रो हक इस्तेमाल कीनो।
- प्रदेश मांय 4 जून ने व्हेवण वाळी वोटों री गिणती सारू कर्मचारियां री सिखावण सरू व्ही।

000

राज्य मांय पड़ रही जोरदार गर्मी रा असर ऊं आज उत्तराद-आतूणी हलकां मांय चूरू समेत केई ठौड़ां पारो 45 डिग्री सेल्सियस ने पार कर ग्यो। म्हाणा चूरू खबरनवीस बतायो के शहर मांय आज ई रूत रो सब ऊं उन्नो दिन रह्यो।

-----

सवाईमाधोपुर जिला मांय ई पारो चढबा ऊं बाजार सूना निजर आया। जैसलमेर मांय ई संवारे ऊं ई तेज गर्मी ऊं सैलाणी ई कम आ रहया है। पाली मांय ई पारो 43 डिग्री सेल्सियस ताई चढ ग्यो। वठे न्यारी-न्यारी ठौड़ां पाणी रा मटका अर कैम्पर रख र प्याऊ लगाई ज्यी है अर बाजार मांय छाया सारू तिरपाल ताणी ज्यो है। टोंक मांय ई जोरदार गर्मी पड़ रही है। सांचौर जिला मांय पड़ रही जोरदार गर्मी ऊं लोगां ने घणी परेशानी व्ही। सरहदी जिला बाड़मेर मांय ई जोरदार तावड़ो पड़ रह्यो है। श्रीगंगानगर अर जैसलमेर मांय पड़ रही जोरदार गर्मी ऊं जिन्दगी माथे घणो असर पड़ रह्यो है। श्रीगंगानगर मांय आज सब ऊं बत्तो 46 दशमलव 3 डिग्री सेल्सियस तापमान दर्ज करी ज्यो। बाड़मेर मांय 46, जैसलमेर मांय साढ़े पैतालीस अर वनस्थली अर पिलानी मांय 45 दशमलव 1 डिग्री सेल्सियस तापमान दर्ज करी ज्यो। भरतपुर मांय पड़ रही जोरदार गर्मी ऊं उल्टी-दस्त अर दूजी मौसमी बीमारियां रा मरीजां री तादाद मांय बघोतरी व्हे रही है। ई बीचे मौसम विभाग आज सरू व्ह्यो लू रो दौर आवता एक सप्ताह ताई चालण री शंका जतायी है। जयपुर, भरतपुर अर कोटा संभाग रा कुछ हलकां मांय आवता 48 घंटां मांय पारो 43 ऊं 45 डिग्री सेल्सियस ताई चढबा अर कठे-कठे लू बाजण री शंका है। जोधपुर अर बीकानेर संभाग मांय आवता 2-3 दिन 25 ऊं 30 किलोमीटर प्रति घंटा री रफतार ऊं आंधी चालण रा आसार है।

000

राज्य री पहली महिला उपमुख्यमंत्री डॉ. कमला बेनीवाल रो आज जयपुर मांय पूरा सरकारी मान सागे दाग कर दियो ज्यो। ई मौके मोटी तादाद मांय जनता अर मान्योड़ा लोग मौजूद रहया। ई मौके प्रदेश कांग्रेस अध्यक्ष गोविन्द सिंह डोटासरा कहयो के डॉ. बेनीवाल राज्य मांय न्यारा-न्यारा महकमा री मंत्री रा तौर ऊं बेहतरीन काम कीनो। विधानसभा अध्यक्ष वासुदेव देवनानी कहयो के डॉ. कमला पूरा मान सागे जनता रा भला रा काम कीना अर जनता ने साता दीनी।

000

जयपुर रा राजभवन मांय आज सिक्किम रो स्थापना दिवस मणायी ज्यो। ई मौके राज्यपाल कलराज मिश्र राजस्थान मांय रह रह्या सिक्किम रा लोगां सागे बातचीत कीनी अर वां ने सिक्किम रा स्थापना दिवस री बधाई अर शुभकामनावां दीनी। ई मौके वे कह्यो के सिक्किम कुदरती तरीका ऊं संपन्न व्हेवण सागे देश री सनातन संस्कृति ने आगे चलावण वाळो है। राज्यपाल सिक्किम ने घाटियां, जंगल, अर नदियां रो प्रदेश बताता थकां पर्यावरण ने बचावण सारु वठे करी ज्या कामां ऊं सीख लेवण री अपील कीनी।

000

राजस्थान मेडिकल सर्विसेज कॉरपोरेशन री प्रबंध निदेशक नेहा गिरि राज्य रा सरकारी अस्पतालां मांय मरीजां ने दवाइयां मुफ्त मुहैया करावण सारु जरूरत रे मुताबिक स्टॉक राखण रा हुकम दीना है। वे आज जयपुर मांय प्रदेश रा सरकारी अस्पतालां मांय दवाइयां री उपलब्धता अर पूर्ति रा बारा मांय सगळा जिला अर मेडिकल कॉलेज दवा भण्डारां रा प्रभारी अहलकारां सागे वीडियो कॉन्फेस रे मार्फत राखी ज्यी समीक्षा बैठक मांय बोल रही ही। वे औषधि भण्डार रा प्रभारी अहलकारां ने अस्पतालां री टेम-टेम परां जांच करण रा हुकम ई दीना।

000

देश मांय लोकसभा चुनाव 2024 रा पहला चार दौर मांय 45 करोड़ ऊं बत्ता मतदाता वोट देवण रो हक इस्तेमाल कीनो है। निर्वाचन आयोग ऊं मिली जाणकारी रे मुजब आम चुनाव रा पहला चार दौर मांय 66 दशमलव नौ-पांच फीसदी वोट पड्या। आयोग आवता दौर मांय व्हेवण वाळा चुनाव सारु सगळा मतदातावां ऊं वोट देवण री अरज कीनी। पाली मांय लोकसभा चुनाव मांय पड्या वोटों री गिणती री ड्यूटी मांय लगायी ज्या कर्मचारियां ने 20 ऊं 22 मई ताई पहला दौर री अर 3 जून ने दूजा दौर री सिखावण दी जावेला।

जिला निर्वाचन अधिकारी एल. एन. मंत्री आ जाणकारी दीनी। झालावाड़ मांय ई वोटों री गिणती री ड्यूटी मांय लाग्योडा कर्मचारियां ने आज पहला दौर री सिखावण दीरीजी। झालावाड़ रा जिला कलेक्टर आज ईवीएम वेयरहाऊस रो दौरों कीनो अर जरूरी हुकम दीना।

000

राज्य रो कृषि आयुक्तालय सगळा जिला अर ब्लॉक कृषि अधिकारियां ने कृषि आदान निर्माता, विपणनकर्ता, डीलर अर खुदरा कारोबारियां कानी ऊं करी जा रही गड़बडियां री शिकायतां पाछे ऐडो करण वाळां रे खिलाफ कार्यवाही करण रा हुकम दीना है। कृषि आयुक्त कन्हैया लाल स्वामी बतायो के काश्तकारां ने बेहतर किस्म वाळा कृषि आदान मुहैया करावण सारु राज्य मांय उनाळू साखां सारु डोढ महीना रो गुणवत्ता नियंत्रण अभियान चलायो जा रह्यो है।

000

प्रदेश मांय चिकित्सा अर स्वास्थ्य विभाग री ओर ऊं मातृ शिशु स्वास्थ्य अर पोषण दिवस रे मौके आज प्राथमिक चिकित्सा केंद्रां, शहरी प्राथमिक स्वास्थ्य केंद्रां, आंगनबाडी केंद्रां अर सामुदायिक स्वास्थ्य केंद्रां मांय टीका लगायी ज्या। सवाईमाधोपुर मांय आस वाळी लुगाइयां अर बच्चां रे टीका लगायी ज्या। ई सागे ई उम्मीदवाळी लुगाइयां ने गर्भावस्था, टीका लगावण, पोषण, संतुलित आहार अर टेम सर जांच करावण रा बारा मांय जाणकारी दीरीजी। जैसलमेर मांय जिला प्रजनन अर शिशु स्वास्थ्य अधिकारी डॉ. नारायण राम सांवला, भोजका, धायसर, जावन्ध जूनी, जावन्ध नई अर चांदन हलकां मांय टीका लगावण रा काम रो जायजो लीनी। वे आस वाळी लुगाइयां अर बच्चां रे टीका लगावण सारु करी ज्यी व्यवस्थावां री जाणकारी ले र जरूरी हुकम दीना। बांसवाड़ा रा अस्पतालां मांय डेंगू री रोकथाम सारु सावधानियां रा बारा मांय जाणकारी दीरीजी।

000

पाली ज़िला रा रानी उपखंड हलका रा जीवन्द कला गांव री आंगनबाड़ी केंद्र नम्बर 1 परां आंगनबाड़ी मांय पढ़बा वाळा 3 ऊं 6 साल तांई उम्र रा बच्चां ने आज महिला अर बाल विकास विभाग री ओर ऊं पोशाक अर पोषाहार वितरण करी ज्यो। ई मौके स्वास्थ्य रा बारा मांय जाणकारी ई दीरीजी।

000

जयपुर ग्रामीण ज़िला मांय जमवारामगढ़ कने डांगरवाड़ा मोड़ माथे आज व्ह्या सड़क हादसा मांय 5 जणां री मौत व्हे ग्यी अर 9 जणा जख्मी व्हे ग्या। तेज रफतार ऊं जा रही दो कारां री टक्कर रे कारण व्ह्या ई हादसा मांय जख्मी व्ह्या लोगां ने आंधी रा सफ़ाखाना मांय भर्ती करायी ज्या, जठे ऊं घणा जख्मी 3 जणां ने जयपुर रा सवाईमानसिंह अस्पताल मांय रैफ़र कर दिया ज्या। बूंदी ज़िला मांय हिंडोली कने नेशनल हाईवे नम्बर 148 माथे एक स्कूल कने मेटाडोर अर कार री टक्कर रे कारण व्ह्या हादसा मांय दो जणा री मौत व्हे ग्यी अर तीन जणा जख्मी व्हे ग्या। मरण वाळा गुजरात रा सोमनाथ जिला रा रहवासी हा अर चारधाम री यात्रा कर र हरिद्वार ऊं गुजरात जा रह्या हा। जख्मी लोगां रो बूंदी रा सरकारी अस्पताल मांय ईलाज चाल रह्यो है। भरतपुर ज़िला मांय फतेहपुर मोड़ कने सड़क माथे ऊबा व्हे र बात कर रह्या एक ही पिरवार रा तीन जणां ने तेज रफतार मोटरसाइकिल टक्कर मार दीनी। हादसा मांय एक महिला री मौके ई मौत व्हे ग्यी जद के वां रा पिरवार रा दो जणा जख्मी व्हे ग्या। पुलिस मौका ऊं फ़रार व्ह्या मोटरसाइकिल सवार री तलाश कर रही है।

000

जोधपुर रा सम्भागीय आयुक्त बीएल मेहरा आज बालोतरा रा ज़िला अस्पताल रो दौरो कीनो। वे भर्ती मरीजां ऊं व्यवस्थावां रा बारा मांय जाणकारी लीनी अर मुफ्त दवाई काउंटर अर जांच केंद्र रो ई दौरो कर र व्यवस्थावां रो जायजो लीनो।

000

अजमेर मांय पुलिस न्यारा-न्यारा हलकां ऊं गम्या मोबाइल फ़ोन बरामद कर र वां रा मालिकां तांई पूगाया है। अजमेर रा एस.पी. देवेन्द्र कुमार विश्‍नोई बतायो के पुलिस गम्योड़ा 176 मोबाइल फ़ोन बरामद कीना, ज्यां रो मोल करीब 35 लाख रुप्या मान्यी ज्यो है। वे बतायो के कंपनियां री मदद ऊं गुमशुदा मोबाइल फ़ोन ने ईएमआई नंबर रा आधार ऊं ढूँढी ज्या अर ऐड़ा मोबाइल फ़ोन काम ले रह्या लोगां ऊं बरामद कर र असली मालिकां ने सूंपी ज्या।

000